

## BERNADINA GROVELL HONRA DURANTE CELEBRACION DIA NACIONAL DI HIMNO Y BANDERA

ORANJESTAD(AAN) -- Durante e celebracion di Dia Nacional, dia Himno y Bandera na Plaza G.F. Croes, señora Bernadina Grovell, a ser honra.

Señora Bernadina Grovell a cuminsa canta na edad di 12 año y cu su ruman muher Maria Abelina nan a forma un duo cu tabata canta nan

propio composicionnan cu Trio Brasil.

Cu edad di 16 año, na 1955 Bernadina a funda Trio Las Campiranas consistiendo di Lucrecia Stamper, Anna Kock y Bernadina. Nan promer presentacion tabata na Radio Kelkboom y despues nan a toca tambe na Voz di Aruba y Radio Antil-

liana. Na 1963/1964 Las Campiranas a actua na Bonaire y mester menciona cu semper nan a presenta nan propio composicionnan.

Bernadina Grovel a compone como 700 cancion durante su carera artistico cu a cuminsa 44 año pasa. Bernadina a compone hopi tumba pa e festival di tumba



di Aruba.

Pa celebracion di e 25 aniversario di nos carnaval, Bernadina a graba un disco 45 y pa conmemora su 30 año di carera artistico, Bernadina a graba un longplay cu 10 composicion propio di cual esun cu mas e ta gusta ta "Un Soño".

Bernadina a actua den obranan di teatro tambe manera e comedia di Eligio Melfor, "One man Show" di Vale Croes y cu Percy Jean-dor.

Diferente gruponan musical a graba disconan cu composicionnan di Bernadina Grovell manera Grupo Maya, Sensacion del Caribe, Ruben Lobo y su Orquesta, Rudy Plaate, Dhaddy Brokke y Dedhalavie

combo.

Esaki sigui ta un reconocimiento pa e talento artistico di Bernadina. Especialmente pa Sensacion del Caribe, Bernadina Grovell a compone hopi cancion cu a ser canta pa su esposo Cecil kende ta manage di e conjunto.

Siendo un persona hopi activo, Bernadina Grovell na 1965 a funda un grupo di gaita bao di e nomber Estrella di Oro y tambe grupo Amistad.

Pa su gran aporte na desaroyo di nos cultura, Ministro encarga cu Asuntonan Cultura, señora Lili Beke - Martinez a entrega ariba dia di celebracion di Himno y Bandera, un plakaat na Bernadina.